

2 TSIMOOT

Ta jawén Tsimoot hã Paw-Ro ma erih do hahÿÿh

1 Paw-Ro ÿ ti hÿÿh, P'op Hagä Do karën do hyb n'aa Kristo Jesus mejüü do see ÿ bahado däk doo. ÿ tamejüü ÿ baher'oot hyb n'aa ta wób sa hã, Kristo Jesus hã ji h'yy kae bã, hÿ pong jé ta pa had'yyt hë ji bawät da. Ti né hë ti ji hã taky n'aa enooh doo. ² Õm ÿ edëng Tsimoot, tah ÿ hadoo doo, ÿ kamahã doo.

ÿ karën P'op Hagä Do ër Yb, Jesus Kristo ër Wahë N'aa na-ããj hë ky en'yym a hã. ÿ karën õm rat'yyd mehüin, baad õm rah'yyb n'yym.

Taw'ääts hë h'yy ganajëng doo me ji gadoo ji ahoop do ky n'aa hahÿÿh

³ P'op Hagä Do wë ÿ h'yy gadajang a hyb n'aa. P'op Hagä Do wë ÿ moo wät hëp ÿ hanäm doo me, wahëh ÿ makü rabahed'oo do paa da. ÿ hyb n'aa es'ee had'yyt hë õm ÿ ky n'aa etsëë bã, adëb bã ÿ ky n'aa etsëë bã, atsëm ÿ ky n'aa etsëë bã. ⁴ Tak'ëp ÿ karën õm ÿ bahegã paawä, tak'ëp ÿ tsebë hyb n'aa paawä. Hyb n'aa manabaan hã ÿÿ mabaoot do ër ketyn hõm bã. ⁵ Baad ÿ hyb n'aa esee nyy da t'öp madäk doo me mah'yy ka'eeh Jesus hã. ÿ hapäh, a hoonh Roots häd näng do hadoo, a ÿÿn Ew-Nis häd näng do hadoo né hë mah'yy kae däk. ⁶ Ti hyb n'aa, taw'ääts hë p'aa hënh mah'yy kadaw'uuh, baad mamoo wät hyb n'aa P'op Hagä Do Sahee anoo do paa a hã, a nuu gó moh ÿÿ ÿ dasooh noo gó. ⁷ Ta ti ÿ wén näng, P'op Hagä Do Sahee dooh ji eÿÿm bã tan'oo bã. Ji h'yyb tym tahej'oonh, ta karën do ji bahajaa hyb n'aa. Tanoo ji kamahã doo. Tanoo ji hã ji bahajaa hyb n'aa ji h'yy keb'aah nesaa do hã.

⁸ Ky hebyy manä Jesus ër Wahë N'aa ky n'aa maher'oot do hã. Nu mebyy manä hëp ÿ n'aa, Kristo hyb n'aa ÿ radawäts gëet do hyb n'aa. Taw'ääts hë P'op Hagä Do hejój me mabahoop nemon ÿÿ ër rarejä bã panyyg hanäm do hyb n'aa. ⁹ P'op Hagä Do né hë ti ër hed'ëep do paa banesaa do mahãnh. Ër tasëew hõm tsyt hë ta wë, takarën doo da ër babok hyb n'aa. Ji mo haj'aa jawén nado ji tabasëew hõm. Ji tawén sëew hõm, sahõnh hë tadu dahäng do pooj jé tii da takarën do hyb n'aa. Kristo Jesus hyb n'aa taky ennym ër hã, ër takamahã, nes'aa né paawä ëër. ¹⁰ Hÿÿ kã, Kristo Jesus, ji h'yyb tym dëeb bahyng do hã ër hã taky ennym, ër takamahã, ër hã tametëeh. Kristo ahäj jëng dajëb hejój paah.

Ër da genyyh. Ta ky n'aa hanäm do hä tametëeh er hä ji edëb had'yyt hë do tyw n'aa. ¹¹P'op Hagä Do y tasëew höm, ta ti ky n'aa rod, Jesus mejüü do na-ääj hë y bahadoo hyb n'aa, y ma metëek hyb n'aa ta ky n'aa. ¹²Ti hyb n'aa y bahoop y radawäts gëet doo. Ti hado né paawä yÿh, dooh y hebyy bä ta ti hyb n'aa. Y hapäh ta ti ta hä y h'yy ka'eeh doo, Kristo. Baad y bahapäh ta ti tahajaa baad tabahag'ääs ta ky n'aa hä y tanoo doo, tamatëeh bä kä.

¹³Menyyw had'yyt hë a h'yyb gó a hä y ma met'ëeg wät doo. Taw'ääts hë hadoo do ky n'aa né tii. Taw'ääts hë Jesus hä mah'yy kae had'yyt hë. Taw'ääts hë sahõnh hë makamahän had'yyt hë. Ër hajaa Jesus hä er h'yy ka'eeh, ta wób er kamahän, séd er h'yyb hedoo do hyb n'aa Kristo Jesus hä. ¹⁴P'op Hagä Do Sahee er h'yyb gó hawät do hejój me baad manä a hä P'op Hagä Do anoo do paah, ta ky n'aa, ta see hadoo tanadoo hyb n'aa da.

¹⁵Mahapäh né hë, sahõnh hë Jesus hä h'yy ka'eeh do Asija häd näng do häj n'aa bä hena do y raberéd wät. Pigeer, Emok häd enäh doo, ti na-ääj né hë y reréd wät.

¹⁶Y karën Tak'ëp Hyb N'aa Jawyk Do t'yyd mehün Onesip, ta tób yt haj'eenh do na-ääj né hë, hajöo nuu me y h'yy gadajang tan'oo bä do hyb n'aa. Dooh tanu mebyy bä hëp y n'aa, y radawäts gëet do hä. ¹⁷Roma bä takajaa noo gó, baad y tabesoos jé pad'yyt hë, y tawyyd kän. ¹⁸Y karën Jesus Kristo, er wahë n'aa, t'yyd mehün Onesip hä, sahõnh hë P'op Hagä Do ky n'aa etyy noo gó. Baad mabahapäh né hë tak'ëp y Onesip masa paa Epeso häd näng do panang bä.

2 Õm kä tah y hadoo doo, tak'ëp h'yy kahejój Jesus hä mah'yy ka'eeh do hä. Õm da Kristo Jesus h'yyb hej'oonh, ky enyym do hyb n'aa a hä. ²Ta ti mamaa napäh do y metëek doo, hajök her'oot doo, y karën matab'ëes ajyy baad hadoo do sa hä, ta wób rama metëek hajaa doo kä.

³Warahén baad habok do raky daheeh sa wahë n'aa kyyh, ragadoo na-ääj hë rahoop doo. Ti hadoo taw'ääts hë nemon yÿ magado Tak'ëp Hyb N'aa Jawyk Do hyb n'aa ji ahoop do sa mo haj'aa, ji ky n'aa rarejää do na-ääj né hë. ⁴Warahén baad habok doo, dooh rah'yy kawapëen bä warahén nadoo do ramoo bok do hä. Tii d' rawén d'oo, sa wahë n'aa rah'yyb en'yym do hyb n'aa. Õm na-ääj hë, Jesus Kristo warahén n'aa hadoo mabahadoo do hyb n'aa, h'yy kawapëen manä Jesus er wahë n'aa manejúü do hä. ⁵Jé tsyym kas'yÿ doo, wajaah doo, dooh tagado bä j'aa ketsë

do sām, kas'ỹỹ do ky n'aa jaw'yyk do taky nadahé bã. Ti hyb n'aa taw'ãäts hē kas'ỹỹ doo, waj'aah do hadoo mabad'oo. Taw'ãäts hē baad maky daheeh Jesus õm tamejũũ doo. ⁶Taw'ãäts hē jé gëew gó tak'ëp moo wät doo, pooj jé tagadoo ta joom s'ëeb. Taw'ãäts hē tii d' mabahadoo. Tak'ëp baad ub mama met'ëeg, mamaher'ood Jesus ky n'aa, ta sām magadoo hyb n'aa. ⁷Mahyb n'aa newë ta ti a hã ÿ her'oot doo. Tii d' madoo bã, õm P'op Hagä Do h'yy gan'yyh sahõnh hē mabahapäh hyb n'aa takarën doo.

⁸Jesus Kristo mahyb n'aa es'ee, ganä wät do dajëp do paa P'op Hagä Do an'oo bã, Dawi makũ panaa paah. Ti ky n'aa hanäm do rod n'aa ỹỹh. ⁹Ti ky n'aa hyb n'aa ÿ rarahejää, ÿ rawén moo maw'yyd däk haak sapuuw hadoo doo me. Mo haj'aa dahej'ëep do hadoo ÿ ran'oo bã. Tii d' né paawä ÿ rabad'oo, P'op Hagä Do kyyh dooh takamaw'yyd bã. Dooh mesoo péh. Ta ti awäd had'yyt hē badäk hahỹ haw'ääts hē. ¹⁰Ti hyb n'aa ÿ gadoo né hē ÿ ahoop do sa mo haj'aa. ÿ wén gadoo tii, P'op Hagä Do asëew hõm do sa hyb n'aa, ramaa napäh hyb n'aa ta ky n'aa, sa h'yyb Kristo Jesus bed'ëep hyb n'aa, banäm doo hënh ta sii ta bag tak'ëp gabarëeh do mahang rababoo had'yyt hē hyb n'aa.^a ¹¹Te hub né hē hahỹỹh:

Kristo hyb n'aa ji dajëb bã,
ta sii ji baboo däk da.

¹²Ji gado bã had'yyt hē ji ahoop do Kristo hyb n'aa,
ji bag'ääs da ta sii.

Kristo ji ky n'aa jejën bã,
ji na-ääj hē ta ky n'aa jejën da P'op Hagä Do hã.

¹³Dooh né paawä baad ji awäd bã had'yyt hē Kristo sii,
ji tahagää had'yyt hē,
ji takamahän had'yyt hē.

Dooh tahaja ta daaj hē taky kehỹỹd bã.

Taw'ãäts hē ji moo wät P'op Hagä Do gen'aak do ky n'aa hahỹỹh

¹⁴Mamaher'ood ta wób sa hã a hã ÿ her'oot doo. P'op Hagä Do matym gó mamejõ sa hã raky kaned'aak hyb n'aa kyy p'ää. Dooh baad tado bã ji ky kedak doo. Taw'ãäts hē nado ti maa new'ëe do sa hã. Tarejää maa new'ëe doo. ¹⁵Taw'ãäts hē baad mama met'ëeg

^a **2.10** Paw-Ro ky dawuh bã paawä tanahoop hyb n'aa, dooh paawä raky n'aa napëe bã Jesus ky n'aa. Dooh redëb bã tii bã P'op Hagä Do wë. Ti hyb n'aa Paw-Ro gadoo tahoop doo.

P'op Hagä Do ky n'aa, P'op Hagä Do gadoo hyb n'aa mamoo wät doo. Taw'ääts baad hadoo do moo wëed mabahadoo. Baad y wén karën mamoo wät, manu manebyng hyb n'aa mamoo wät do hä, baad ub mama metëek hyb n'aa baad hadoo do ky n'aa.

¹⁶ Mamaa newë manäh, P'op Hagä Do nahapäh do her'oot doo da her'oot doo, daap hadoo do ky n'aa her'oot doo. Er'ood manä sa sii. Dewë hä magyys hë ta ti hedoo do rababoo däk P'op Hagä Do mahänh. ¹⁷ Kah'üüm rama metëek doo, nahëe saraa ji hä ket'ëe hõm do hadoo. Ti hyb n'aa, awäd manä sa mahang. Imenëw, Piret häd enäh do ta ti hed'oo do sa wób. ¹⁸ Reréd hõm baad hadoo do ky n'aa. Èr ganä wät paah, sa nooh. Dooh ji ganä wäd bä ta jawén, sa nooh. Daap ta tii d' rama metëek. Ti hyb n'aa sa kyyh maa new'ëe do wób dooh baad raky dahé boo P'op Hagä Do panyyg. ¹⁹ Tii d' nado P'op Hagä Do kyyh. Te hub né hë tii. Tahajaa ta kyy hä ji h'yy kasadëe bä. Dooh taky kahyÿd bä. Hahyÿ da P'op Hagä Do kyy kerih doo: “Tak'ëp Hyb N'aa Jawyk Do hapäh ta hä h'yy ka'eeh doo.” Hahyÿ da ji tamejüü: “Taw'ääts hë nesaa do mahänh dawëe rakan'yuh Jesus sa wahë n'aa ramaneëenh doo.”

²⁰ Tak'ëp ma näng do tób bä ti anäng waa hood k'ääts tég gabarëeh do s'ëeb ta wób, k'ääts tég hawak do s'ëeb ta wób. B'aa s'ëeb, tsäng s'ëeb hedoo do ta wób. Ky n'aa gebah do s'ëeb, hanäm do hood tii. Ky n'aa ganebah do s'ëeb, hanäm do hood nado tii.

²¹ Ti hadoo Jesus hä h'yy ka'eeh do sa hä. Ji daaj hë baad ji kanä bä nesaa do mahänh, hanäm do hood hadoo ji. Hanäm do ji moo wät hyb n'aa, ji P'op Hagä Do asëew hõm tsyt hë. P'op Hagä Doo, èr Kariw N'aa ma hä èr hajaa èr moo boo bä tii bä, tsyt hë èr tabasëew hõm do hyb n'aa. ²² Ti hyb n'aa baad kanä pahëew h'yyb hadoo do nesaa do hä mahänh. Taw'ääts hë baad hadoo do hä mah'yyb däg. Mahüüm had'yyt hë Jesus hä mah'yy ka'eeh doo. Mahüüm had'yyt hë P'op Hagä Do makamahän doo, a da hadoo do makamahän do na-ääj né hë. Mahüüm had'yyt hë a h'yyb hanäm do sa hä. Tii da y karën mabad'oo ta wób sa sii, h'yyb näm doo gó Jesus hä raber'oot do sa sii.

²³ Mamaa newë manä daap ke'aanh doo, daap kaher'oot doo. Mahapäh ti né hë du n'aa kawajään doo gó raky kedak doo. ²⁴ P'op Hagä Do sii moo heb'ook doo, Jesus hä h'yy ka'eeh do sa wahë n'aa, taw'ääts hë dooh ky ked'aak do rado bä. Taw'ääts hë kaja hë denaa hë sa h'yyb ramahüüm sahõnh hë sa wë. Taw'ääts hë da baad rama metëek. Taw'ääts hë dooh renyyw bä h'yy gaëenh doo.

²⁵ Taw'ääts hē kaja hē denaa hē rama metëëk sa hā ganen'aak doo. Nepäh P'op Hagä Do h'yyb wareem bä, baad hadoo do ky n'aa rabahapäh, raky daheeh hyb n'aa. ²⁶ Ta tii kä baad däg p'aa hēnh sa h'yyb tym hanäm do hā kä. Baad rakanä däk tii bä sa hā Dijab^b wadii do mahänh, tamesoo do paa mahänh. Ta ti hedoo do Dijab mesoo do paa hadoo, takarën do ramoo bok hyb n'aa.

Sahõnh hē gawatsig hõm do pooj jé panyyg n'aa hahÿyh

3 Mahyb n'aa es'ee ti hahÿyh: Sahõnh hē gawatsig hõm do pooj jé, tak'ëp da tanesaa ji hā. ² Sa hā hē had'yyt hē rahyb n'aa newëë da ti noo gó. Rahyb n'aa hūüm magyys hē da sa ma. Sa daaj hē raj'aa etsë da. Sa hā hē rah'yy kasab'ee da. P'op Hagä Doo, ta wób na-ääj hē raky n'aa rejää da. Sa yb, sa ÿÿn, dooh d' raky dahé bä. Dooh d' taw'ääts hē tado sa hā ragadoo doo. Dooh da P'op Hagä Do rawehëë bä. ³ Dooh da rakamahän péh. Maneban sa da hadoo do sa mo haj'aa. Ta wób da ranu mer'oot, raky n'aa rejää da. Dooh da sa h'yyb ramedug bä nesaa do hā. Dooh d' rat'yyd mehīn péh. Sahõnh hē da rarejää rakarën doo da. Dooh d' ragenaag bä baad hadoo doo. ⁴ Baad raky kenäw né paawä, ta wób da raky n'aa her'oot sa majī hā. Daap hē ragado nyh sa h'yyb tym. Sa daaj hē sa hā rabahajaa, sa hā. Rah'yy karën do rakamahän da. Dooh da P'op Hagä Do hā rakamahän bä. ⁵ P'op Hagä Do karën do ramoo bok ji edoo né paawä, j'ooj madäk doo me tii d' rabad'oo. P'op Hagä Do hejój raty n'aa ges'yyk. Dawëë kanä da ta ti hedoo do sa mahänh. ⁶ Ta ti rah'yyb wedii ragadoo hyb n'aa sa tób bä. Tii bä rahajaa rawedii ÿÿj wób h'yy gatamah doo, ta ti ÿÿj raky süüt hyb n'aa raheer'oot doo. Ta ti hedoo do ÿÿj hajõng sa hā nesaa doo, nesaa do jawén sa h'yyb tym bawät do hyb n'aa. ⁷ Ta ti hedoo do ÿÿj ta tii d' had'yyt rakarën rama kametëëk, dooh paawä rahaja bä rah'yy kadawuung bä baad hadoo do ky n'aa hā. ⁸ Ta ti hedoo doo ma matëg oow, baad hadoo do ky n'aa majī tii. Janes, Jām häd enäh do hadoo tii, Mosees hā rah'yy kawapëen do paah. Baad nado wäd ta ti sa h'yyb tym. Dooh P'op Hagä Do karën wäd ta tii, heh'äät ub nadoo do hyb n'aa ta hā rah'yy ka'eeh doo. ⁹ Sahõnh hē rah'yy genäh da sa hā. Ti hyb n'aa dooh da rahūüm bä ta bahänh. P'ooj ub habok do paa hadoo da, Janes, Jām häd enäh do paah.

^b **2.26** Gereg kyy me ramaneëenh Nesaa Do Yb, Dijab. “Ji taky n'aa tapa had'yyt doo”, tahanäng pé ti Dijab.

Taw'ääts hē ji ky dahé had'yyt hē P'op Hagä

Do panyyg ji hã rama metëëk doo

¹⁰ Mahapäh né ti ÿ ma metëëk doo, nyy da ÿ bawät do baad ub, h'ëëd hyb n'aa ÿ bawät. Mahapäh né ti nyy da ÿ h'yy ka'eeh P'op Hagä Do hã, nyy da h'yyb jawyk doo gó ÿ bawäd wät, nyy da sahõnh hē ÿ kamahãn, nyy da h'yy ganajëë hõm doo me ÿ bawät ÿ rarejã né paawä. ¹¹ Mahapäh né hē nyy da ÿ rarejãã, nyy da ÿ bahoop do sa mooh. Mahapäh né hē ti nyy da ÿ rano n'aa masoo panang ãn-Tijoka, Ikonijo, Ris häd enäh doo bä. Sahõnh hē ta ti ÿ ahoop do mahãnh, ÿ rarejãã do mahãnh ÿ P'op Hagä Do ed'ëëp. ¹² Sahõnh hē P'op Hagä Do karën doo da hawät do karën doo, Kristo Jesus karapee rabahadoo do hyb n'aa, rarejãã né da. ¹³ Nanäng ky nesaa doo, j'ooj madäk doo me ky ken'yyim doo, ti bahãnh däg da sa hã nesaa doo. Rawedii da ta wób, ta ti rawedii na-ääj né da sa hã. ¹⁴ Õm kä, baad maky dahé had'yyt hē ÿ karën, a hã rama metëëk do paa hã. Mahapäh né ti baad a hã mama kametëëk do paah, baad mabahapäh hyb n'aa õm ma metëëk do paah. ¹⁵ Õm karapee noo gó õm rama met'ëëg wät tak'ëp hanäm do P'op Hagä Do kyy kerih doo. Ta ti õm tah'yy gan'yyh, mabahapäh hyb n'aa nyy da õm P'op Hagä Do bed'ëëp Kristo Jesus hã mah'yy ka'eeh do hyb n'aa. ¹⁶ Sahõnh hē P'op Hagä Do kyy kerih doo, P'op Hagä Do né hē ti hanoo. P'op Hagä Do né hē ti h'yy gan'yyh raberih hyb n'aa. Ta tii hã baad ub panyyg hanäm do ji metëëk. Ta tii hã ji metëëh ta wób sa hã resõots hõm doo. Ta tii hã ji ma metëëk ny hadoo do ji eréd hõm doo. Ta tii hã ji metëëh nyy da P'op Hagä Do karën doo da ji bawät. ¹⁷ Ti hyb n'aa kä, ramaa newë bä, raky dahé bä, baad né hē P'op Hagä Do karapee rabahajaa ramoo boo bä sahõnh hē baad hadoo do P'op Hagä Do karën doo.

4 Kristo Jesus matëëh bä kä taky n'aa etyy da sahõnh hē badäk hahÿÿ hã habong doo, hedëp doo, dejëp do na-ääj hē. Ti awät do hyb n'aa, tadu doo do hyb n'aa tabag'ääs doo, P'op Hagä Do matym gó, Kristo Jesus matym gó na-ääj hē õm ÿ mejüü hahÿÿh: ² Maher'ood panyyg hanäm do sahõnh hē sa hã. Maher'ood sa hã rakarën bä ramaa newë bä, rakanarën bä na-ääj né hē. Maky geãm sa hã baad ranaboo bä. Manabuu j gedo baad nadoo do moo bok doo. Mah'yyb tsebé sa hã, baad hadoo do ramoo bok hyb n'aa. Taw'ääts hē h'yyb jawyg gó mama met'ëëg sa hã. ³ Tii d' ÿ wén karën mabad'oo, ti awät do hyb n'aa ti noo gó dooh rakarën

bä ramaa newë bä panyyg heh'äät ub do hä ma kamahetëk doo. Resoos da sa ma matëg n'aa, ragen'aak do rama metëek hyb n'aa sa hä. Tii da rawén d'oo, rah'yy karën doo da rababok do hyb n'aa. ⁴Raty n'aa ges'yyk da baad hadoo do ky n'aa. Ramaa newë däg kän da panyyg daap menyyh doo. ⁵Öm kä, baad menyyw had'yyt hë a h'yyb tym kä. Magado Jesus hyb n'aa ji ahoop do sa mo haj'aa, ji ahoop do ji raky n'aa rejãã doo. Maher'ood Jesus ky n'aa hanäm do ta wób sa hä. Baad mamoo wäd. Magawatsiig hóm sahõnh hë, a hä P'op Hagä Do anoo do mamoo wät do pan'aa. ⁶Tii d' y wén karën mabad'oo, edaa däk do hyb n'aa y radaj'ëep. P'op Hagä Do hä y kan'oo däk y dajëp bä. ⁷Tak'ëp wajaah doo, tsyym kas'yÿ do hadoo paa yÿh. Tak'ëp y moo wäd wät Jesus ky n'aa y her'oot do hä. Y haja däk hä y P'op Hagä Do karën doo. Tsyym kas'yÿ doo, wajaah do kajaa do hadoo yÿh. Dooh paa hëp y y eréd bä Jesus hä y h'yy ka'eeh doo. ⁸Hÿ jawén, p'aa hënh Jesus bahyng bä, y gadoo da y moo wät do sãm, P'op Hagä Do karën doo da y moo wäd wät do sãm. Jesus Kristo, baad had'op doo, nes'õös doo me sahõnh hë sa hä ky n'aa etyy doo, anoo da hä y tii. Hä y had'yyt nado tabanoo. Tanoo né da ta hä baad gad'aa do sa hä na-ããj né hë.

Tsimoot hä Paw-Ro maher'oot nyy d' rabad'oo ta hä ky n'aa hahÿÿh
⁹Y karën paawä nyyw hë mabana wë yÿ, ¹⁰Demas y teréd wät do hyb n'aa. Badäk hahÿÿ hä habong do P'op Hagä Do hä h'yy kana'eeh do rah'yyb padëek do hä tah'yyb däg däk, takamahän kän, y tawén eréd hóm. Tesaronika hënh tabahóm. Èr hÿÿj hadoo do Keresën häd näng do ahóm Garata häd näng do häj n'aa hënh. Tiit ahóm Dar-Masija hënh. ¹¹Jããm né Rukas haym hata yÿ. Mabana bä da, y karën mamana a sii Maah-Ko. Y karën y tamoo masa. ¹²Tikiko y mejõ hóm Epeso panang hënh tabahóm hyb n'aa, t'ïi hënh tamasa hyb n'aa. ¹³Mabana bä da mamana a sii saror y hebaan doo, aj'yy Kar-Pos häd näng do wë y eréd däk doo, panang Torowas häd näng doo bä. Mamana na-ããj hë ma kahé bäh kerih doo, kap'õøj däk doo. Mamana na-ããj hë ta byyh s'ëeb ta hä kerih do na-ããj né hë. Ta ti né tak'ëp y karën up doo.

¹⁴Aresän, sapaar s'ëeb moo hew'ëet doo, hajõng nesaa do tamoo wät hä yÿ. Tak'ëp Hyb N'aa Jawyk Do ky n'aa etyy da tii. ¹⁵Baad mamatakä òm Aresän narejãã hyb n'aa. Tak'ëp né hë tahyb n'aa wareem Jesus ky n'aa èr her'oot do hä. Èr her'oot do majiï né tii.

16 Jããm né hê pooj jé hã ÿ rakamajĩĩ do ky n'aa ÿ her'oot noo gó, tabad'op hê ÿ rahadaa hõm ÿ raky masa hyb n'aa paawã. Ý karẽn P'op Hagã Do mabaan hõm ti ÿ ramanasa doo. 17 Ý né paawã neheda sa hã, P'op Hagã Do ti ÿ tahada, ÿ tah'yyp hej'oonh. Ti hyb n'aa, sahõnh hê Jesus ky n'aa ÿ hajaa ÿ her'oot sahõnh hê Judah buuj nadoo do sa hã. Ý P'op Hagã Do ed'ëep ÿ radajëeb mahãnh. 18 Tak'ëp Hyb N'aa Jawyk Do ÿ ted'ëep da sahõnh hê nesaa do mahãnh. H'yyp nyyw gó ÿ tamahũũm da hÿ pong jé tabag'ããs bã. Taw'ããts hê P'op Hagã Do ji j'aa etsëe had'yyp hê. Ýÿ. Tii d' né hê. Taw'ããts hê.

19 Mamaher'ood Pisiir, ta patug Akira daheeh, ÿ hyb n'aa esee sa hã. Mamaher'ood na-ããj hê Onesip, ta tób yt haj'eenh do na-ããj né hê, ÿ hyb n'aa esee sa hã. 20 Eras baym Korĩn bã. Toropimo ÿ eréd sooh panang Mirét hãd nãng doo bã, nahëe nãng do hyb n'aa. 21 Ý karẽn mahyb n'aa bawaad tabahahëem do pooj jé makajaa hyb n'aa babã. Ajyy Ew-buh, Pudën, Rĩĩn hãd enãh doo, ÿÿnh Karaw-Dija hãd nãng doo, hajõk ta wób Jesus hã h'yyp ka'eeh do na-ããj hê, õm mã rahyb n'aa esee. 22 Tak'ëp Hyb N'aa Jawyk Do hã ÿ ky n'aa etsëe a h'yyp tym gó tabawãd had'yyp hê hyb n'aa. Ý karẽn P'op Hagã Do ky ennym sahõnh hê bë hã. Jããm hê kã.